

A dì 25, fo San Marco. Il principe a messa in chiezia con le cerimonie. Portò la spada sier Leonardo Michiel, va capetanio a Zara; fo suo compagno sier Nicolò Lippomano. E poi non andoe a pranso con li patricij invidati, per esser venere. Eravi etiam il conte Vanis di Poliza, vestito con una caxacha d' oro; et la matina li savij si reduseno a lezer le letere.

Dil provedadar Griti, date sopra il Polesene, eri. Chome havia fato tajar l' Adexe a Tresenta, justa i mandati di la Signoria nostra, per inondar il Polesene, acciò francesi non passasseno; et lauda Marco di Rimano, contestabele, aversi ben portato.

Item, fo aperto li officij, et mandato danari ozi in campo.

A dì 26, la matina, fo letere di sier Andrea Donado, podestà et capetanio di Treviso, di eri. Com' è li sier Gasparo Valier, quondam sier Stefano, havia amazato Rocho, cao di cavalari, posto a la custodia dil vin e contrabandi, qual era in protetion dil consejo di X; unde fo gran mormoration per il principe e altri di colegio, e terminato farne provisione.

Vene letere di la corte di Bologna, di 23 et 24.

Da poi disnar fo pregadi, et scritto in corte a l' orator nostro.

Fu posto, per li savij, che tutti quelli hanno deposità per volte et botege, depositando a raxon de 5 per 100, siano liberamente soe, con altre clausole, sicome in la parte si contien, qual sarà qui avanti posta.

Fu posto, per li ditti, elezer de presenti do executori per 6 mexi, con pena, justa la forma di la parte; et presa, fato il scurtinio, rimaseno: sier Domenego Malipiero, fo savio a terra ferma, quondam sier Francesco, e sier Lucha Trum, fo cao dil consejo di X, quondam sier Antonio; e acceptono.

Et, licentiatò il pregadi, restò consejo di X, et preseno di retenir sier Gasparo Valier, quondam sier Stephano, qual havia amazà Rocho a Treviso, et feva ogni anno di grandissimi contrabandi. Et cussì la note, per il capetanio dil consejo di X, con molti officiali, in caxa sua, a le Zatre a San Trovaxo, fu preso, qual fe' grandissima defesa, maxime di alcuni cani grandi che l' ajutavano assai. Hor fu preso et posto in camera.

Nota. Eri, da poi disnar, ai Frari minori sier Zuam Baxadona, di sier Andrea, tenne la conclusion publice in filosofia, e si portò ben.

Scurtinio di do provedadori executori, justa la forma di la parte, con pena. 72

† Sier Domenego Malipiero, fo savio di terra ferma, quondam sier Francesco.

Sier Marco Antonio Loredam, fo cao dil consejo di X, quondam sier Zorzi.

Sier Pollo Valaresso, fo di pregadi, quondam sier Cabriel.

Sier Stefano Contarini, fo capetanio a Padoa, quondam sier Bernardo.

Sier Sabastiam Moro, è di pregadi, quondam sier Damiam.

Sier Carlo Valier, fo a le raxon vechie, quondam sier Hironimo.

Sier Giacomo Badoer, fo consier in Cypro, quondam sier Sabastian, el cavalier.

Sier Gasparo Malipiero, fo avogador di comun, quondam sier Michiel.

† Sier Lucha Trum, fo cao dil consejo di X, quondam sier Antonio.

Sier Alvixe Malipiero, è di la zonta, quondam sier Stefano, procurator.

Sier Nicolò Pasqualigo, fo patron a l' arsenal, quondam sier Vetur.

Sier Francesco da Leze, fo provedador sopra le camere da terra ferma, quondam sier Lorenzo.

Non. Sier Sabastian Zustignan, el cavalier, fo savio a terra ferma, è eletto baylo a Constantinopoli.

Nota. In questi zorni per il consejo di X con la zonta, fo acceptà la oblation di sier Batista Contarini, di sier Carlo, che noviter sia maridà in la fia quondam sier Zorzi Nani, et era electo, per il consejo di X, sopracomito, qual presta ducati 1500 a la Signoria, zoè 1000 per lui, et vegnir in pregadi come li altri, et 500 a scontar in le angarie.

A dì 27, domenega. Fu fato la procession per esser la domenege di Apostoli; zoè il principe andò a San Zuminiam con le cerimonie, et portò la spada sier Francesco Valaresso, electo podestà e capetanio a Civaldi di Bellum; fo suo compagno sier Zorzi Simitecolo, quondam sier Zuanne; et poi tutti andono a pranso con il principe, qual non fu fato questo Sa Marco, perchè era venere.

Di sier Andrea Griti, provedador zeneral, fo letere, date sul Polesene. De occurrentiis, et il colegio si reduce di savij a consultar zereha angarie.